

3. november 2015

**Kingusinnerpaamik UKA2016-imut atatillugu Kalaallit Nunaanni Inatsisartunut qinersisarneq pillugu inatsit nr. 9, 31. oktober 1996-meersumut, kiisalu Kommunalbestyrelsinut, Nunaqarfinni Aqutsisunut Ilagiillu Sinniisaannut qinersisarnerit pillugit inatsit nr. 7, 3. december 2012-meersoq pillugu Inatsisartut inatsisaannut allannguutissanik saqqummiussinissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tamakkiisumik Inatsisartunut aammalu kommunalbestyrelsinut, Nunaqarfinni Aqutsisunut Ilagiillu Sinniisaannut qinersisinnaanermut tamakkiisumik qinersisinnaanermut ukiorisat ullumikkut 18-iusut 16-inngortillugit.**

(Inuit Ataqaatigiit Inatsisartuni ilaasortaataat)

Qinersisinnaanermut ukiorititat ullumikkut 18-iusut 16-inngortinneqarnissaannik aalajangiiffigisassatut siunnersuut Siumumiit imaattumik oqaaseqarfigissavarput.

Oqaluttuarisaaneq qiviassagaanni qinersisarnermi periutsit assigiinngitsutigut allannguuteqarlutillu ineriartortinneqartarsimapput, ilaatigut qinersisinnaanermut ukiorititat aamma appartikkiartuarterinneqarsimallutik. Maannakutullu qinersisinnaanermut ukiorititat 18-inngortinneqarsimanerat ukiut 40-t missaasa matuma siorna atuutilersinneqarsimasoq Siumumiit allannguuteqartinneqarnissaannik takorluugaqaratalu siunertaqaanginnatta matumani erseqqissaatigissavarput.

Siumumiit paasinninnerput naapertorlugu siunnersuummi matumani siunertarineqartut marluupput, naak siunnersuutip taasissutissartaani ataasiinnartut isikkoqaraluartoq. Siullertut inuusuttut 16-inik ukioqalereersimasut Inatsisartunut, Kommunalbestyrelsinut, Nunaqarfinni Aqutsisunut kiisalu Ilagiit Sinniisaannut qinersisinnaalernissaat matumani anguniarneqarpoq, tassanilu siunnersuuteqartunit tunngavilersuutigineqarluni qinersisinnaanermut ukiut piumasaqaataasut 16-inut appartinnerisigut inuusuttut tamat oqartussaaqataanneranni akuutinneqarnerunissaat anguneqarsinnaanera unnerlugu.

Siumumiit isumaqarpugut inuusuttuaqqat inuusuttullu tamat oqartussaaneranni peqataaffigisinnasaat tunngavissilluarneqarsimasoq, taamaattoq kaammattuerusuppugut inuusuttut akornanni peqatigiiffiit suliniarfiusut inerisaqqinneqassasut inuusuttut oqartussaaqataannerat annertusarumallugu. Inuusuttuaqqat inuusuttullu inuiaqatigiinni isummersoqataasinnaanerat sunnuteqaqataasinnaanerallu taamaalilluni nukittorsarneqartuartaqartoq Siumumiit isumaqarpugut, tamassumalu eqqummaariffigineqarluni inerisartuarneqarnissaa tamatta pisussaaffigaarput.

Siunnersuutip tunngavilersorneqarnermigut siunertarisaata aappaa Siumumiit tassaasoraarput qinersisinnaanermut ukiorititat 18-iniit 16-inngortinnerisigut innuttaasut inuiaqatigiit ineriartornerinut akuutinneqartut amerlinerisigut qinersinerni amerlanerusut qinersiartortarnissaat anguneqarsinnaasoq.

Siumumiit kissaatigilluinnarparput inuiaqatigiit tamat oqartussaaneranni peqataanerat suli annertunerusariaqartoq. Qinersisarnernilu kisitsisit takutitsinerattuut qinersiartunngitsoortartut amerlassusaat eqqarsarnartoqartipparput, tamassumalu sumik tunngaveqarnera eqqoriaruminaappoq.

Taamaattorli inuit namminneq qinersiartussanerlutik qinersiartussannginnerlutilluunniit aalajanger-tarnerat ataqisariaqartoq Siumumit isumaqarpugut, qinersiartortannginnermi immineerluni aamma oqariartorneruvoq.

Siumumiit nuannaarutigaarput ilaatigut Inuusuttut Inatsisartuunik pilersitsisimaneq, taamaalillutik meeqqat inuusuttullu isummersornermi peqataatinneqarmata.

Maluginianngitsoorneqarsinnaanngilarlu Inuusuttut Inatsisartuinit qinersisinnaanermut ukiussariti-taasut allanngortinneqarnissaannik tunngasumik maannamut piumasaqaateqartoqarsimananilu oqa-llisiginnittoqarsimanngitsoq, taamaattumillu aalajangiiffissaq inuiaqatigiinni pineqartut pisariaqar-titsinerat naapertorlugu saqqummiunneqarsimansoq ersarlulluni takussutissartaqarnani.

Taamaattumik taakkununga tunngasut tunngavilersorluakkamik eqqarsaatigilluakkamillu tamatigut oqaluuserineqarlutillu suliarineqartariaqarput. Isumassarseriataarneq pisariaqartitsinermik tunnga-veqanngitsoq apeqqutini taamaattuni suleriaasissaanngitsoq Siumumi isumaqarpugut.

Taamatut oqaaseqarluta siunnersuutip massuma itigartinneqarnissaa Siumumiit inassutigaarput.

Anders Olsen  
Siumut